

**Jadikan Ramadan bulan untuk kawal nafsu bukan beribadah sahaja - Tun Dr Mahathir**  
**Astro Awani**  
**5 Mei 2019**

**KUALA LUMPUR:** Umat Islam perlu menjadikan bulan Ramadan sebagai bulan untuk mengawal nafsu dan tidak menganggap ia semata-mata bulan untuk beribadah, kata Perdana Menteri Tun Dr Mahathir Mohamad.

Dr Mahathir berkata dengan mengawal nafsu umat Islam tidak akan melakukan apa sahaja yang dilarang oleh agama dan masyarakat.

"Kita anggap puasa ini sebagai satu ibadah yang penting dalam membentuk peribadi kita. Kerana dalam bulan puasa kita mengawal diri daripada melakukan apa-apa yang dilarang oleh agama Islam khususnya, bukan hanya tak boleh makan tetapi masih banyak lagi yang perlu kita kawal.

"Ini adalah khasiat daripada amalan puasa pada bulan Ramadan. Insya-Allah kita akan dapat berpuasa dalam keadaan yang sempurna dan saya harap kita semua akan menjadi manusia yang lebih baik kerana kawalan diri yang kita amalkan," katanya dalam rakaman perutusan Ramadan yang disiarkan pada Ahad.

Perdana Menteri juga mengingatkan umat Islam supaya tidak membazir dengan membeli juadah secara berlebihan di bazar Ramadan.

"Walaupun kita sedar bahawa mereka yang mengadakan bazar Ramadan ini berharap untuk mendapat pendapatan yang lebih baik dalam bulan Ramadan, tetapi pada masa yang sama kita juga mesti kawal diri dan tidak membazir wang yang ada pada kita," katanya lagi.

Terdahulu Penyimpan Mohor Besar Raja-Raja Datuk Seri Syed Danial Syed Ahmad mengumumkan umat Islam Malaysia akan mula berpuasa pada Isnin, 6 Mei 2019.

Syed Danial berkata tarikh permulaan puasa bagi negeri-negeri di seluruh Malaysia ditetapkan pada Ahad berdasarkan perintah Yang di-Pertuan Agong setelah diperkenan oleh Duli-Duli Yang Maha Mulia Raja-Raja.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/jadikan-ramadan-bulan-untuk-kawal-nafsu-bukan-beribadah-sahaja-tun-dr-mahathir-206934>